



SLUŽBENE NOVINE

KANTONA SARAJEVO

Godina XXX - Broj 18

Četvrtak, 8. 5. 2025. godine
SARAJEVO

ISSN 1512-7052

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 41. stav (1), a u vezi sa članom 49. Zakona o elektronskom upravljanju u Kantonu Sarajevo ("Službene novine Kantona Sarajevo", broj 6/25), Vlada Kantona Sarajevo, na 72. sjednici održanoj 24.04.2025. godine, donijela je

ODLUKU O OSNIVANJU SAVJETA ZA ELEKTRONSKU UPRAVU

Član 1.

(Osnivanje Savjeta za elektronsku upravu)

Ovom odlukom osniva se Savjet za elektronsku upravu kao savjetodavno tijelo Vlade Kantona Sarajevo (u daljem tekstu: Savjet) radi praćenja razvoja elektronske uprave, predlaganja mjera za unapređenje elektronske uprave, razmatranja stručnih pitanja u oblasti informaciono-komunikacionih tehnologija (u daljem tekstu: IKT) i koordinacije aktivnostima koje se odnose na razvoj elektronske uprave shodno odredbama Zakona o elektronskom upravljanju u Kantonu Sarajevo ("Službene novine Kantona Sarajevo", broj 6/25) (u daljnjem tekstu: Zakon).

Član 2.

(Rodna neutralnost izraza)

Izrazi koji se koriste u ovoj odluci, a imaju rodno značenje, koriste se neutralno i odnose se jednako na muški i ženski rod.

Član 3.

(Definisanje pojmova)

Pojmovi i izrazi koji se koriste u ovoj odluci imaju isto značenje određeno Zakonom.

Član 4.

(Nadležnost i zadaci Savjeta)

Nadležnost i zadaci Savjeta su:

- a) praćenje i analiziranje stanja u oblasti elektronske uprave,
- b) razmatranje stručnih pitanja u oblasti IKT koja se odnose na razvoj elektronske uprave,
- c) predlaganje aktivnosti i mjera za unapređenje stanja u oblasti elektronske uprave, te njihovo usmjeravanje, koordiniranje i praćenje,
- d) davanje prethodne saglasnosti na projekte i programe organa javnog sektora, kao i na planirana sredstva za digitalizaciju usluga iz okvira nadležnosti organa javnog sektora,
- e) pripremanje i podnošenje izvještaja Vladi Kantona Sarajevo (u daljnjem tekstu: Vlada) u skladu sa članom 10. ove odluke,
- f) učestvovanje u izradi strateških, planskih i programskih dokumenata iz oblasti elektronske uprave, te iniciranje izmjena postojeće zakonske i podzakonske regulative iz oblasti elektronske uprave,
- g) unapređenje saradnje u oblasti elektronske uprave između organa javnog sektora, jedinica lokalne samouprave, te drugih nadležnih organa i drugih relevantnih subjekata.

Član 5.

(Način imenovanja predsjednika i članova Savjeta)

- (1) Savjet se sastoji od predsjednika i šest članova.
- (2) Vlada će na prijedlog Ministarstva pravde i uprave Kantona Sarajevo (u daljnjem tekstu: Ministarstvo) imenovati predsjednika i članove Savjeta, i to predstavnika Ministarstva kao predsjednika Savjeta, te predstavnike Kabineta premijera Kantona Sarajevo, Ministarstva finansija Kantona Sarajevo, Zavoda za informatiku i statistiku Kantona Sarajevo i Saveza općina i gradova Federacije Bosne i Hercegovine, i dva vanjska eksperta iz oblasti IKT-a kao članove Savjeta.
- (3) Izbor dva vanjska eksperta iz oblasti IKT-a kao članova Savjeta se vrši na osnovu javnog poziva koji objavljuje Ministarstvo.
- (4) Standarde i kriterije za izbor članova Savjeta iz stava (3) ove tačke, utvrđuje ministar pravde i uprave.

Član 6.

(Predsjednik Savjeta)

Predsjednik Savjeta predstavlja Savjet, saziva sjednice i stara se o organizaciji rada i izvršavanju poslova iz nadležnosti Savjeta.

Član 7.

(Mandat Savjeta)

Predsjednik i članovi Savjeta imenuju se na mandat od četiri godine.

Član 8.

(Prestanak članstva)

Članstvo u Savjetu prestaje:

- a) istekom mandata,
- b) podnošenjem ostavke,

- c) razrješenjem ukoliko član ne obavlja ili nije u stanju da obavlja poslove člana Savjeta, na prijedlog tog člana Savjeta ili na prijedlog dvotrećinske većine svih članova Savjeta.

Član 9.

(Način rada i odlučivanje)

- (1) pitanjima iz svoje nadležnosti Savjet raspravlja i odlučuje na sjednicama.
- (2) Savjet na prvoj sjednici donosi Poslovnik o radu kojim bliže uređuje način rada i odlučivanja Savjeta.
- (3) Tehničku i administrativnu podršku radu Savjeta pruža Ministarstvo.

Član 10.

(Izvještaji)

- (1) Savjet podnosi Vladi izvještaj o radu najmanje jednom godišnje, a najkasnije do 31. marta tekuće godine za prethodnu godinu.
- (2) Savjet podnosi Vladi izvještaj o stanju u oblasti elektronske uprave u Kantonu Sarajevo najmanje jednom godišnje, te informiše Vladu o svim bitnim pitanjima u oblasti elektronske uprave.

Član 11.

(Naknade)

- (1) Dva vanjska eksperta iz oblasti IKT kao članovi Savjeta imaju pravo na mjesečnu naknadu za rad pod uslovom da je u mjesecu za koji se naknada treba isplatiti, održana najmanje jedna sjednica Savjeta, a visinu naknade utvrđuje Vlada u skladu sa odredbama kantonalnog propisa kojim se uređuje pitanje načina obrazovanja i utvrđivanja visine naknade za rad radnih tijela koje obrazuje Vlada i rukovodioci kantonalnih organa državne službe.
- (2) Naknada se isplaćuje na teret razdjela budžeta Ministarstva.

Član 12.

(Stupanje na snagu)

Ova odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-14256-8/25
24. aprila 2025. godine
Sarajevo

Po ovlaštenju premijera
Ministar
Omer Osmanović, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 41. stav (1), a u vezi sa članom 49. Zakona o elektronskom upravljanju u Kantonu Sarajevo ("Službene novine Kantona Sarajevo", broj 6/25), Vlada Kantona Sarajevo, na 75. sjednici održanoj 15.05.2025. godine, donijela je

**ODLUKU
O IZMJENAMA ODLUKE O OSNIVANJU SAVJETA ZA
ELEKTRONSKU UPRAVU**

Član 1.

(Izmjena člana 5.)

U Odluci o osnivanju Savjeta za elektronsku upravu ("Službene novine Kantona Sarajevo", broj 18/25), u članu 5. stav (4) mijenja se i glasi:

"(4) Standarde i kriterije za izbor članova Savjeta iz stava (3) ovog člana utvrđuje Vlada."

Član 2.

(Izmjena člana 9.)

U članu 9. stav (1) mijenja se i glasi:

"(1) O pitanjima iz svoje nadležnosti Savjet raspravlja i odlučuje na sjednicama."

Član 3.

(Stupanje na snagu)

Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-24215-21/25

15. maja 2025. godine

Sarajevo

Po ovlaštenju premijera

Ministar

Afan Kalamujić, s. r.